



ज्ञाजलपा वाऱ्वा

JWOJALAPA NEPALBHASA WEEKLY

दै: ६ ल्या: २९ पूर्णाङ्क: ८१

ने. सं. ११३६ पोहेलागा चतुर्दशी आइतवा: २०७२ माघ २४ गते आइतवार (Feb- 7, 2016)

मू: ८/- (च्यातका)

नेवा: पत्रकार राष्ट्रिय दबूया निक्व:गु त:मुँज्या

लोकतन्त्र दिवस खुन्हु किपुलिइ याइगु

देय्न्यंकया नेवा:

पत्रकारत

बैशाख ११ गते

किपुलिइ वइगु



फागुन २१ गतेनिसैं जिल्ला जिल्लाया अधिवेशन

ज्वज्वलपा वा:पौ /

देय्न्यंकया थीथी संचार माध्यमय ज्या यानाच्चर्पिं नेवा: पत्रकारतय्गु मंका:गु राष्ट्रिय संगठन नेवा: पत्रकार राष्प्रीय दबूया निक्व:गु त:मुँज्या थुगुसी ऐतिहासिक नगर किपुलिइ याइगु जूगु दु ।

नेवा: पत्रकारतय्गु हक अधिकार, पहुँचया नितिं संगठित रुपं हे नेवा:त न्ह्या: वनेमा: धका: महसुस याना नीस्वंगु नेवा: पत्रकार राष्प्रीय दबू आदिवासी जनजाति पत्रकार महासंघया संस्थापक दुज: संस्था नं ख: ।

नेवा: पत्रकारतय्गु संगठित याना वयाच्चंगु नेवा: पत्रकार राष्प्रीय दबूपाखें मुलुकय लोकतान्त्रिक गणतन्त्र अर्थात लोकतन्त्र हयेगु नितिं महत्वपूर्णगु नेतृत्वदायी भूमिका म्हितगु किपू व किपूमित जूगुलिं हे थुगुसी लोकतन्त्र दिवसया दिनय लाका त:जिक किपुलिइ

त:मुँज्या यायेगु धका: तयारी या:गु ख: ।

वंगु शुक्रवा: खप जिल्लाया थिमिइ नेवा: पत्रकार राष्प्रीय दबूया केन्द्रीय समितिया मुँज्या उगु कथं निर्णय या:गु ख: । उगु मुँज्या थुगुसीया निक्व:गु त:मुँज्या किपुलिइ यायेगु धका: निर्णय या:गु ख: । वइगु बैशाख ११ गते लोकतन्त्र दिवस शुक्रवा: खुन्हु देय्न्यंकया नेवा: पत्रकारतय्गु सहभागीता याका किपुलिइ त:जिक त:मुँज्या याना न्हूगु नेतृत्व ल्ययेगु जुइ धा:गु दु ।

नेपाल संवत ११३२ अर्थात थनिइ प्यदं न्हय: नीस्वंगु नेवा: पत्रकार राष्प्रीय दबूया निक्व:गु त:मुँज्या वंगु बैशाख महिनाय हे यायेगु धका क्व:छिनातये धुंकुगु अवस्थाय अबले बैशाख १२ गते त:भुखाय व्ब:गु अनं लिपा देय्या परिस्थिति भन भन स्यना वंगुलिं दच्छि लिपा जूसां त:जिक

निक्व:गु त:मुँज्या यायेगु धका: तयारी या:गु ख: ।

निक्व:गु त:मुँज्याया नितिं जिल्ला जिल्लाया अधिवेशन थ्व हे फागुन २१ गतेनिसैं मसान्त तकया दुने क्वचायेकेगु धका: निर्णय या:गु दु । अथे हे फागुन १ गतेनिसैं दबूया दुज: पौ इनेगु ज्या याइ धा:गु दु । त:मुँज्या त:जिक क्वचायेकेगु नितिं नेवा: पत्रकार राष्प्रीय दबूया केन्द्रीय नाय: नापं किपूया युवा पत्रकार श्रीकृष्ण महर्जनया नेतृत्वय निक्व:गु त:मुँज्या मू ग्वसा:खल: तक नीस्वनेगु ज्या उगु मुँज्या या:गु दु ।

अथे हे दांभरी रमेश मानन्धरयात कजि व सुरेन्द्रभक्त श्रेष्ठयात ल्यू कजि कथं ल्यया आर्थिक कव:, न्वकूपि सुनिल महर्जनयात कजि व उपेन्द्र प्रधानयात ल्यूकजि कथं ल्यया विधान संशोधन तयारी कव:, न्वकू नृपेन्द्रलाल श्रेष्ठयात कजि व मीरा अमात्ययात ल्यूकजि कथं

ल्यया स्वनिगलपिने जिल्ला समन्वय कव: नीस्वनेगु ज्या नं या:गु दु । उगु हे मुँज्या प्रचार प्रसार कव:या कजि कथं न्वकू सुनिल महर्जन व प्रकाशन कव:या कजि कथं छयाञ्जे सुरजवीर बज्राचार्ययात ल्य:गु दु ।

आ: मा:गु कथंया थीथी उपसमिति नं नीस्वनेगु ज्या याकनं हे जुइ धका: दबूया केन्द्रीय नाय: नापं ग्वसा: खल:या कजि श्रीकृष्ण महर्जनं जानकारी बियादीगु दु ।

आ: याकनं हे किपुलिइ क्रियाशिल जुयाच्चर्पिं नेवा: पत्रकारत नाप नापं थीथी पक्ष ग्वहालि यानादीपिं व्यक्ति व संस्थातय्गु मुँज्यानिसैं सहलह ब्याका किपुलिइ जुइगु नेवा: पत्रकार राष्प्रीय दबूया निक्व:गु त:मुँज्या त:जिक क्वचायेकेगु जुइ धका: नं जानकारी बियादीगु दु । आ: याकनं हे सहलह मुँज्या चवना किपुलिइ गुगु कथं

देय्न्यंकया नेवा: पत्रकारतय्गु लसकुस यायेगु नापं व्यवस्थापन यायेगु अले नेवा: पत्रकार राष्प्रीय दबूया निक्व:गु त:मुँज्या क्वचायेकेगु धइगु विषययात कया मुँज्या च्वनेगु जुइ धा:गु दु ।

नेवा: पत्रकार राष्प्रीय दबूपाखें यें जिल्ला, यल जिल्ला, खप जिल्ला, भवत जिल्ला, धादिङ जिल्ला, नुवाकोट जिल्ला, इलाम जिल्ला, भुपा जिल्ला, सुनसरी जिल्ला, कास्कि जिल्ला, मकवनपुर जिल्ला, नुवाकोट जिल्ला, मोरङ जिल्ला निसैं देय्न्यंक याना थ्यंथ्यं स्वंगू दर्जन जिल्लाया नेवा: पत्रकारतय्गु जिल्ला कचात नीस्वने धुंकुगु दु ।

आ: निक्व:गु त:मुँज्याया भवलय नं थीथी कथंया जिल्लाय नेवा: पत्रकार राष्प्रीय दबूया कचा नीस्वनेगु जुइ धका: धा:गु दु ।

न्हापांगु त:मुँज्याया किपा: विशेष २ पेजय स्वयादीफइ

नवाऱ्वा पत्रकार राष्ट्रिय दबू

जनजाती जागरण अभियान

नेवा: प्रदेशमा आदिवासी

जनजाती जागरण अभियान

संविधान सम्बन्धी चासो तयादीपिन्त सूचं

आदिवासी जनजातिया दृष्टिकोणय्

न्हूगु संविधान सहलह ज्याभ्व:

ज्यापु महागुथि किपू नगर समितिया ग्वसालय्

नेवा: प्रदेशय् आदिवासी जनजाति जागरण अभियायानया संयोजनय्

वइगु फागुन ७ गते किपुलिइ



ज्वजलपा वाऽपौ

सल्लाहकार
श्रीकृष्ण महर्जन
प्रकाशक:

नजरराम महर्जन
सम्पादक

श्रीकृष्ण तण्डुकार
ले-आउट:

ज्वजलपा डेस्कटप
संवाददाता

भरत महर्जन, निरजमान सिंह
थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४९४०९०७७

ई-मेल : kirtipursandesh@live.com

सम्पादकिय

नेवा: पत्रकार राष्ट्रिय दबूया निक्व:गु त:मुँज्या किपुलिइ

नेवा: पत्रकार राष्ट्रिय दबूया निक्व:गु त:मुँज्या किपुलिइ जुइगु सुचं व:गु दु । वइगु वैशाख ११ गते लोकतन्त्र दिवसया दिनयु किपुली जुइगु उगु त:मुँज्या किपूया नितिं छगू अवसर व छगु गर्वया विषय जुयाच्वंगु दु । नेपा:या हरेक आन्दोलनयु किपूया महत्वपूर्ण भूमिका दुगु ला सकसिनं स्यूगु हे खँ जुल । उकिं लोकतन्त्र दिवस खुन्हु हे किपुली त:मुँज्या यायेगु क्व:छयूगु ख: ला ?

किपू नगरपालिका घोषणा जूगु १९ दँ दयेधुंकल । अयनं किपूलिं थ:त नगरया रुप बिइमफुनि अले मनुतसें किपूयात नगर या रुपयु स्वयेगु मया:नि । किपुली पिनेचर्चापिं अर्थात यें, यल, ख्वपयापिन्सं किपूयात गां हे तायेका वयाच्वंगु दु । उकिं थन सभा सम्मेलन यायेत मा:गु स्तरीयहल, च्वनेत होटल या लज मदु धका: कुंखिनेगु या: । उकिं थन निन्हु स्वन्हु बिका याइगु सभा सम्मेलन बांलाक जूगु मखं ।

अभूतक नेपा:या ४२ गू जिल्लाया नेवा: पत्रकारपिं नेवा: पत्रकार राष्ट्रिय दबूया दुज: जुइधुंकूगु दु । ४२ जिल्लाया प्रतिनिधिपिं त:मुँज्यायु ब्वतिकायुत किपू वइबलयु इमि न्ह्योने किपूया म्हासिइका न्ह्यब्वये दइ । किपूली त:मुँज्या यायेगु निति मा:गु हल मदु, च्वनेत थायु मदु धाइपिन्त क्यनेगु थ्व छगू त:धंगु मौका जुइफु । किपूया बारे प्रचार प्रसार यायेगु त:धंगु अवसर ख: । थ्व सम्मेलन सफलता पूर्वक क्वचायेके फत धा:सा लिपा लिपा नं मे मेगु राष्ट्रियस्तरया संगठनया राष्ट्रिय सम्मेलनत नं किपुली यायेगु ह्व:ता चूला: वयेफु ।

संघीय समाजवादी फोरम, नेपा:या संघीय ढाँचा समानुपातिक समावेशी



-राजेन्द्र श्रेष्ठ-

संघीय समाजवादी फोरम, नेपालं उत्पीडित राष्ट्रियतातयगु मुक्तिया नितिं संघीयता व श्रमजीवी वर्गया मुक्तिया नितिं समाजवादया आज्ञु त:गु दु । थ्व नेपा:या इतिहासयु हे न्हूगु खँ ख: । थुकिं जातीय मुक्ति व वर्गीय मुक्तियात नापनापं ल्हवंगु दु । उकिं संघीय समाजवादी फोरम, नेपाल श्रमजीवी वर्ग व उत्पीडित समुदायया केन्द्र ख: । सामन्ति राजतन्त्रया अन्त्यलिसें थुगु पार्टी युगौयुगनिसं उत्पीडनयु ला:गु उत्पीडित जाति, समुदायतयगु मुक्तियात महत्वया नापं पला: छिना: वयाच्वंगु दु, स: थ्वयेका: वयाच्वंगु दु ।

विश्व कम्युनिष्ट आन्दोलनया अनुभवयात स्वयेबलयु रुसयु लेनिनं थ:हे उत्पीडक जातिया जूसां नं वर्गीय मुक्तिलिसे उत्पीडित समुदायया माग सम्बोधन यात । तर, नेपा:या अनुभवयात स्वयेबलयु नेकपा एमाले, एमाओवादीयें जा:गु पार्टी दुनेया उत्पीडक जातिया नेतासं उत्पीडित समुदायया मुक्तिया खँ निर्वाचनया इलयु मत फवनेगु ल्वाभ: जक दयेकल । इमिसं पण्डित राहुल संस्कृत्यायनं भारतयु कम्युनिष्ट आन्दोलनया असफलताया सन्दर्भयु धा:थें मार्क्सवादयातिसवें ब्राम्हणवादयात प्रश्रय बिल । उकिं नेपा:यु आ: उत्पीडित वर्ग व समुदायया मुक्तिया निति इमित हे केन्द्रविन्दु दयेका: जिमिसं पार्टी एकीकरण यानागु ख: ।

पार्टी एकीकरण पार्टीयात व्यवहार यु हे समानुपाति समावेशी दयेकेगु दिशायु महत्वपूर्ण उपलब्धि का:गु दु । जिमिसं दावा याना धायेफु कि नेपालयु दूगु मेगु छुं नं पार्टीसिबें थ्व पार्टी समानुपाति समावेशी जुयाच्वंगु दु । थुकिं गुज्व:गु समाज उज्व:गु हे पार्टी

संरचना निर्माण यायेगु जिमिगु अभियानयात सार्थक दयेकूगु दु ।

आ: नेपा:या आपालं पार्टीत वर्ग व लोकतन्त्रया नामयु असमावेशी जक मखु इमिके एकल जातीय नेतृत्व व वर्चस्व दयाच्वंगु दु । नेपाली कांग्रेस, नेकपा एमाले, एमाओवादी थुनिया उदाहरण ख: ।

पार्टीया चरित्र हे एकल जातीय जूगु जुया: नेपा:या राज्यसत्तायु नं उकिया लिच्च: ला:गु दु । अथेहे नेपाली कांग्रेस, नेकपा एमाले व एमाओवादीया पार्टी संरचनाया विरोध याइगु गुलिखे पार्टीत नं जातीय वा क्षेत्रीय रुप हे निर्माण जूगु दु । जिमिगु पार्टी एकीकरण थुक्तियात तोडे या:गु दु व पार्टी ढाँचायात समानुपाति समावेशी ढंगं निर्माण यायेगु व्यवहारिक पला: छयूगु दु ।

थुगु सन्दर्भयु पार्टी विधानया धारा ३६ (३) पाखें “पार्टीया फुक्क समिति व निकायतयके म्होति नं ३३ प्रतिशत मिसानापं सामान्यत: फुक्क समुदायतयगु तोके यानात:कथं समानुपातिक समावेशी जुइगु व्यवस्था यायेगु जुइ । प्रदेश व स्थानीय समितितयके अनया स्थानीय विशेषता अनुरूप हे समानुपातिक समावेशी यायेगु जुइ । छुं नं समुदाय मा:कथंया ल्याखयु महाधिवेशनयु प्रतिनिधित्व मजूसु वा उम्मेदवारी मव्यूसु उज्व:गु थायु खालि तया: लिपा सम्बन्धित समिति पदपूर्ति याइगु जुइ” धैगु व्यवस्था यानात:गु दु । थुगु व्यवस्था केन्द्र, प्रदेश व स्थानीय निकायतयके अनया जाति, समुदायया जनसंख्याया आधारयु समितितयके प्रतिनिधित्व तोकेयायेगु खँया प्रत्याभूति या:गु दु ।

ससफो, नेपाल संघीय ढाँचाया पार्टी ख: । पार्टी शक्ति केन्द्र व प्रदेशतयके बाँडफाँड या:गु दु । थुकिं पार्टीइ नियन्त्रण व सन्तुलन कायम जुइ । थुकिं पार्टी परिचालनया सन्दर्भयु मंका: नेतृत्व व समावेशी प्रतिनिधित्वया नीति का:गु दु । समकालीन नेपालयु पार्टी परिचालनया सन्दर्भयु अध्यक्षात्मक व महासचिवीय प्रणालीतयुत अप्व छयलाबुलायु यानात:गु दु । जिमिसं उगु निगुसिबें ब्यागलं मंका: नेतृत्व प्रणाली विकास यानागु दु ।

न्हूगु युगया नेतृत्व यायेत न्हूगु ढंगया पार्टीया आवश्यकतायात केन्द्रविन्दुइ तयागु दु । न्हूगु ढंगया पार्टीबारे यक्वस्यां खँ ल्हायेफइ, तर थ्व न्हूगु ढंगया ख:कि मखु धैगु खँ उकिं काइगु विचा:, सिद्धान्त, संगठनात्मक नीति, कार्य पद्धतिया आधारयु जक निक्काल जुइ । पुलांगु विचा: ज्वना: न्हूगु ढंगया पार्टी जुइमखु न न न्हूगु पार्टीया निर्माण यायेवं व नयाँ शक्ति जुइफइ । उकिया नितिं विचा:, संगठन व कार्यपद्धतिया ल्याखं न्हूगु ढंगया, पुलांगु पार्टीसिबें ब्यागलं हरेक क्षेत्रयु थ:गु ब्यागलं विकल्प दूगु व नेपाली क्रान्तिया कार्यभारतयुत पूर्वके फुम्ह जुइमा: । सामान्यत: जिमिसं परि कल्पना यानागु न्हूगु ढंगया पार्टीइ क्वयु न्हयथनागु विशेषतात दयेमा:-

न्हापांगु - सिद्धान्तनिष्ठ अर्थात् संघीय समाजवाद व पहिचान नापया संघीय लोकतन्त्रप्रति प्रतिबद्ध ।, निगूगु - संघर्षशील अर्थात् जन संघर्ष व राजनीतिक प्रतिस्पर्धायु श्रेष्ठता हाँसिल यायेफुम्ह ।, स्वंगूगु - राष्ट्रिय चरित्रया अर्थात् जातीय वा क्षेत्रीय मजूसे सिंगो देस ओगटे यायेफुम्ह ।, प्यंगूगु - समानुपातिक समावेशी अर्थात् छुं नं छगू जाति वा समुदायया नेतृत्व व वर्चस्व मजूसे समानुपाति प्रतिनिधित्व जूगु ।, न्यागूगु - खुनशासित अर्थात् पार्टीया नीति निर्णयतयुत पालना यायेगु ।

थथे न्हूगु ढंगया पार्टी वैचारिक रुप संघीय समाजवादप्रति प्रतिबद्ध, संगठनात्मक रुपं समानुपातिक समावेशी व कार्यपद्धतिया ल्याखं जनतालिसे सदां एकाकार जुया: न्हय:ने न्हय:ज्याइम्ह जुइमा: । आ: पार्टीया महत्त्वपूर्ण कार्यभार एकीकरणपाखें प्राप्त वैचारिक उर्जायात पुँजीकृत याना: संगठनात्मक शक्तिइ रुपान्तरित यायेगु ख: । उकिया नितिं दकले त:धंगु हाथ्या पार्टी एकीकरण लिपा खनेदूगु व दइगु पूर्व पार्टीतयगु सोच, चिन्तन, कार्यशैली व व्यवहार ख: । भीदथुया वैचारिक एकतां जिमित भावनात्मक एकताया लँपुइ यंकी व संगठनात्मक शक्तिइ रुपान्तरण याइ । (चवमि सधिय समाजवादी फोरमया सह अध्यक्ष राजेन्द्र श्रेष्ठ ख:)

नेवा: पत्रकार राष्ट्रिय दबूया न्हापांगु सम्मेलनया किपा: विशेष



एकीकृत माओवादी पार्टी तज्याना किपूया नेतातयूत फाईदा स्वम्ह नेता स्वंगू हे ब्यागलं ब्यागलं पार्टीया केन्द्रीय सदस्य



न्हापांगु संविधानसभाया चुनावपाखें दक्ले तःधंगु पार्टी जूगु एकीकृत माओवादी पार्टी आ: वया संसदय स्वंगू तःधंगु पार्टी जक जुयाच्वंगु दु। थ्व दथुइ उगु पार्टी यक्व हे कुचा कुचा जूगु दु। पार्टी कुचा जूगु नाप नाप नेतात नं भन भन अप्वया वःगु दु। किपुलिइ नं नेतात अप्वया वयाच्वंगु अवस्था दु।

थ्व हे दथुइ एकीकृत माओवादी कुचा कुचा जुया स्थानीय कार्यकर्तात चिन्तित जुयाच्वंगु दु। कयौं किपूया हे माओवादीया कार्यकर्तात तःकं चिन्तित जुयाच्वंगु दुसा किपू नगर दुनेया हे माओवादीया नेतातयगु नितिं धा:सा तसकं फाईदा जुयाच्वंगु दु। एकीकृत माओवादी तज्याये न्हय: तक किपूपाखें छम्ह हे केन्द्रीय सदस्य मदुगु अवस्था खःसा आ: धा:सा थःथःगु पार्टीया नेवा: संगठनया केन्द्रीय नाय: नाप नाप पार्टीया केन्द्रीय सदस्यत हे स्वम्ह दये धुंकूगु दु।

एकीकृत माओवादीया एकीकृत नेवा: राष्ट्रिय मुक्ति मोर्चाया केन्द्रीय नाय: नाप पार्टीया केन्द्रीय सदस्य तक जुयादीगु दु पांगाया दिलिप महर्जन। अथे हे पार्टी तज्याये धुंका: नेत्र विक्रम चन्दया नेतृत्वय गठन या:गु नेकपा माओवादीया नेवा: राष्ट्रिय मुक्ति मोर्चाया केन्द्रीय नाय: नाप नाप पार्टीया केन्द्रीय सदस्य पांगाया धनबहादुर महर्जन जुयादीगु दु।

उगु हे कथं डा. बाबुराम भट्टराईया नेतृत्वय गठन या:गु नयाँ शक्तिया केन्द्रीय पषिदया दुज: नाप नाप नेवा: राष्ट्रिय दबूया केन्द्रीय संयोजक किपू क्वयूनाया पञ्चलाल महर्जन जुयादीगु दु।

वय्क:पिं स्वम्ह हे न्हापांगु संविधानसभाया चुनावया इलय् प्रचण्डयात त्याकेगु नितिं महत्वपूर्णगु भूमिका म्हिता किपुलिइ नेतृत्वदायी भूमिका म्हितादीपिं खः। अबले दिलिप महर्जन समानुपातिकया उम्मेदवार जुयादीगु खःसा चुनावया तयारी समितिया कजि धनबहादुर महर्जन व युवातयगु नेतृत्व पञ्चलाल महर्जन यानादीगु खः। निक्कःगु संविधानसभाया चुनाव तक थ्यंगु अवस्थाय् एकीकृत माओवादी तज्यायाये धुंकूगु अले विप्लव माओवादीपाखें धा:सा चुनाव बहिस्कार या:गु खः।

आ: वया पार्टी विभाजन नाप नाप किपूया स्वम्ह नेतातयगु नितिं तःसकं फाईदा जुया विउगु दु। आ: भविष्यय् इपिं नेतातयसं गुरु कथं ज्या याना वनीगु खः धका: मनुतयसं स्वयाच्वंगु दु।



एकीकृत माओवादीया
अध्यक्ष प्रचण्ड व किपूया
नेता दिलिप महर्जन



संविधानसभाया चुनाव बहिस्कार बैद्य माओवादी जुया
लिपा हाकनं विभाजन जूगु विप्लवया नेतृत्वय दुगु
माओवादी नेकपा माओवादीया नाय: नेत्र विक्रम चन्द
विप्लव उगु पार्टीया केन्द्रीय सदस्य अले नेवा: मुक्ति
मोर्चाया केन्द्रीय नाय: पांगाया धनबादुर महर्जन




नयाँ शक्तिया संयोजक
डा. बाबुराम भट्टराई व किपूया
नेता पञ्चलाल महर्जन

**किपूया
सकल नेवा:
पत्रकारपिन्त
हथायूगु सुचं**

**देयन्त्यंकया नेवा: पत्रकारतयगु राष्ट्रिय संगठन नेवा: पत्रकार राष्ट्रिय दबूया
निक्कःगु तःमुँज्या वइगु बैशाख ११ गते लोकतन्त्र दिवस खुन्हु किपुलिइ हनेगु
तयारी या:गु विषययात कया न्ह्यागु भाषाया माध्यमं पत्रकारिता यानाच्चनादीपिं
जूसां नं पौ मथ्यंसां थुगु सुचंयात हे आधिकारिक नाला क्वय् न्हयथना कथंया
थासय् इलय् हे भाया सहलह ब्याकादीत इनाप यानाच्चना।**

**थाय्: नयाँबजार क्लब, नयाँबजार किपू
ई: सनिलया ४:३० ता इलय्
मिति: २०७२ साल माघ २६ गते मंगलवा:**

नेवा: पत्रकार राष्ट्रिय दबू



किपूया गथु प्याखं (गं मखा:गु प्याखं)

सफू बजारय् पिदने धुंकूगु दु थःगु प्रति सुरक्षित यानादिसं

सफू दइगु थाय्

- १) खपया च्याम्हसिंहया स्टेशनरी पस: (श्याम सुन्दरया पस:)
- २) खप कमल विनायकया स्टेशनरी पस:
- ३) किपूया सतःक्वया स्टेशनरी पस:
- ४) किपूया देय् पुगूया बाघभैरव स्टेशनरी पस:
- ५) किपूया पांगा दोवाटोया किपू बूक प्वाइट
- ६) येंया भोताहिंति नातिवज्रया पस:
- ७) येंया कुलाभुलिइ च्वंगु मंका: धुकू पस:
- ८) यल, यल ध्वाखा अर्जुन स्टेशनरी पस:
- ९) स्वापू नितिं मेमेगु फोन नम्बर: ४३३४०९३, ९८४९७५२५८३,
९८४६०४६९२३९

**मू
सच्छि तका जक (१००/-)**



(भाईकाजी महर्जन 'नयन', थौकन्हय नेपालमण्डल टेलिभिजनया म्यानेजिड डिरक्टर जुयाचवनादीगु दु। वयक: यलया सुन्दारा क्वसं चवनादी। वयक: छम्ह नेपालभाषा संगीत, कला-संस्कृति इत्यादी ख्य:या थपू यायेगु नितिं पला: न्ह्यचिला: चवनादीम्ह छम्ह नेपालभाषाह्य:मि ख:। नेपालभाषाया म्यूजिक भिडियो निर्माणया ज्याय् दकले न्हापां पला: तयादीम्ह थ्वयक: भाजु हे ख:। उगु इलय् नयन भाजु किपालुमि जुया: नेपालभाषाया म्यूजिक भिडियो चा: पिथनादीगु ख:। थ्वयां लिपा: वयकलं डेल्टा मल्टि मिडिया प्रा.लि. संस्था पलिस्था याना: आपालं नेपालभाषाया पुलांगु व न्हूगु म्येत मुंका: आपालं म्यूजिक भिडियो चा:त पिथनादीगु दुसा नेपालभाषाया सकिपात नं निर्माण यानादीगु दु। छुं दिं न्ह्य: जक नेपालमण्डल टेलिभिजनयात गौरी अनन्त सिरपा: ल:ल्हा:गु ख:। भाजु भाईकाजी महर्जन नयन नाप जुगु ब:चाधंगु खँल्हावल्हा थन न्ह्यब्वया चवना। -सं.)

दकले न्हापां नेपालमण्डल टेलिभिजनयात गौरी अनन्त सिरपा: ल:ल्हा:गु लसताय यक्व यक्व भित्तुना दु।

यक्व यक्व सुभाय, थुगु सिरपा: धइगु सकल नेपालमण्डल टेलिभिजन परिवार या नितिं हे छगू गर्वया विषय ख:। नापं थुगु सिरपा नेवा: समुदाय नापं सकल नेपा:मिपिनिगु नितिं भविष्य अझ बाँलाक ज्या याना वनेगु नितिं त:धंगु प्रेरणा ब्यूगु दु।

टेलिभिजन ख्यलय् छिगु पला: गुकथं न्ह्यात ?

चिधिक:बलेनिसें हे जित कलाकारिता ख्यलय् दुहाँवयेगु मन दुगु ख:। २०४६ सालय् यलया लगंख्य:या त्रिवेणी कल्चर सेन्टरय् अभिनय कला सयेका। वयालिपा २०५२ सालय् वर्ल्ड भ्यू इन्टरनेशनलय् छाँयांकन सम्बन्धी तालिम कया।

'नेपालमण्डल टेलिभिजन नेवा:तय्गु हे न्हाय्कं ख:' भाइकाजी महर्जन 'नयन'

थ्वहे भवलय् नेवा: म्यूजिक भिडियो दयेकेगु ज्या न्ह्याका। ज्या याना ववं जित: नेपालभाषाया छगू ब्यागलं टेलिभिजन च्यानल द:सा यक्व हे बाँलाइगु महशूस जुल। छक्कलं हे टेलिभिजन च्यानल चायेकेगु तसकं हे थाकूगु ज्या ख:। अथेजुया शुरुइ डेल्टा मल्टि मिडिया प्रोडक्सन स्थापना यानां ज्या न्ह्याका। थुगु संस्था मार्फतं गंगू नेवा: एल्बम, निगू नेवा: सकिपा, अनर्गान्ति नेपाली म्यूजिक भिडियोत, टेलिभिजन ज्याभव:त नापं त:धंगु पर्दाया सकिपात तर्क दयेका। लिपा वना डेल्टा मल्टिमिडियासिबें नं त:जिगू क्षेत्र टेलिभिजन च्यानल चायेकेगु जिगु चिधिक: बलेनिसेंया सपना पुरा यायेगु आजु तया चिधिक:बलेनिसेंया पासापिनापं टेलिभिजन क्षेत्रया विज्ञ पासापिं मिलेजुया २०६७ सालय् नेपालमण्डल टेलिभिजन या स्थापना याना।

टेलिभिजन च्यानल हे सुरु यायेगु विचा: गुकथं वल ? उकिसनं नेपालभाषां हे च्यानल सुरु यायेगु ग्वसा: गुकथं जुल ?

दकले न्हापां ला मांभाय् म्वाका: तयेमा: धइगु भावना जिमिगु नितिं त:धंगु प्रेरणा जुल। वंगु छुं दशकय् प्राविधिक क्षेत्रय् भीसं तायेका:गुसिबें नं यक्व हे त:धंगु ह्यूपा: वयेधुंकूगु दु। न्हापाथे हे भ्यालि थाना मनु मुंका:माइकिङ्ग याना जक खँ तयेगु, खँ थुकइकेगु जमाना आ: मखुत। ई कथं परिवर्तन जुइमफूपिनिगु अस्तित्व सिधयावनीगु खँ प्रमाणित जुइधुंकूगु दु। आ:या आधुनिक व वैज्ञानिक युगय्, सञ्चारमाध्यम उकिइ नं अझ टेलिभिजनया यक्व हे महत्वपूर्ण भूमिका दुगु जिमिसं वा: चायेका टेलिभिजनया माध्यमं आम नागरिकयात न्ह्यावलेनं सुसूचित यायेगु छगू जिम्मेवारी बोध जिमिसं याना। अझ जातिगतकथं स्वयेगु ख:सा नेपा:या अघ्व धइथें सञ्चारमाध्यमतय्सं छुं जाति, भाय् व संस्कृतियात जक हे प्राथमिकताय तया ज्या यानाचवंगु खनेदु। नेवा:त नापं आदिवासीपिनिगु मुद्दा, अधिकार, भाय्, कला, संस्कृति, सम्पदाया विषययात नेपा:या अघ्व धइथें सञ्चारमाध्यमयात ल्हवनाचवंगु खनेमदु। थुगु कारणं याना नं नेवा:तय्गु पहुँच राज्यया दक्व हे अझ्य् ल्यूने लानाचवंगु जिमिसं तायेका। थुगु खँयात नुगलनिसें हे महशूस याना आ: नेवा:तय्गु अधिकारया मुद्दा, भाय्, कला, संस्कृति, सम्पदा आदियात ल्हवनेगु नापं नेवा:तय्गु न्ह्यावलेनं नं सुसूचित व जागरुक यानातयेगु छगू परिकल्पना सहित जिमिसं नेपालभाषाया च्यानल हे शुरु यानागु ख:। मांभाय् भीसं गुलि यक्व छ्यला: वनी उलि हे भीगु मांभाय् नं म्वानाचवनी। सञ्चारमाध्यम, टेलिभिजन च्यानल हे नेपालभाषां सञ्चालन यायेफ:सा नेवा: भाय्, भीगु मांभाय् म्वाका: तयेफइ धइगु थुइका हे नं नेपालभाषां च्यानल शुरु यानागु जुल।

नेपालमण्डल टेलिभिजनय् ज: दुज:पिनिगु वारे छुं धयादीला थें ?

प्राविधिक क्षेत्र, कला, कानूननिसें मेमेगु क्षेत्रय् नं ज्ञाननापं अनुभव दुपिं दुज:पिनिगु पाखें हे नेपालमण्डल टेलिभिजन सञ्चालन जुयाचवंगु ख:। अझ धायेमा:सा नेवा: जुयागु प्रति गर्व तायेकाचवनापिं, नेपालभाषा म्वाका तयेमा: धइगु भावना दुपिपाखें हे नेपालमण्डल टेलिभिजन सञ्चालन जुयाचवंगु दु।

नेपालमण्डल टिभी दकले न्हापांखुसि प्रसारण गुवले जूगु ख: ?

नेपालसम्बत १९३९ या थिलापुन्हि, २०६७ साल पौष महिनाया ६ गते मंगलवा:निसें नेपालमण्डल टेलिभिजनया प्रसारण प्रारम्भ जुल। दकले न्हापां न्हि १ घण्टा प्रसारण यासं जिमिसं शुरुवात यानागु ख:। आ: जिमित खुशी लगेजू कि आ: नेपाल मण्डल टेलिभिजन न्हि १८ घण्टा प्रसारण जुयाचवंगु दु। न्हि २४ सै घण्टा प्रसारण यायेगु लक्ष्य ज्वना जिपिं न्ह्यां वनाचवनागु दु।

नेपालमण्डल टिभी वास्तवय् सूचनामूलक टिभी ख: कि मनोरञ्जनमूलक टिभी ख: ?

सूचनामूलक ख: नापं हे मनोरञ्जनमूलक नं ख:। सूचना व मनोरञ्जन, जिमिसं निगू हे विषययात बराबर प्राथमिकता बिया: न्ह्याकाचवनागु दु। सूचनाया ल्याखं जिमिसं नेपालमण्डल समाचारयात द क्ले प्राथमिकता बियागु दुसा मेमेगु ज्याभव:त नं दुगु हे जुल। अथेहे जित: य:गु म्यें, सिरियलत आदि पुरा हे मनोरञ्जनात्मक ज्याभव: जुल। अथेहे सूचना व मनोरञ्जन निगुलिं नापं बिइगु हसना, सम्पदा, नलिक्यव आदि ज्याभव:त नं जिमिसं प्रसारण यानाचवनागु जुल। उलिजक मखु राजनीतिक चेतना हयेगु नितिं जिमिके नेपालमण्डल दबूथें जा:गु राजनीतिक मुद्दाय् केन्द्रित जुइगु ज्याभव: नं दु। अथेजुया ईया आवश्यकता कथं नेपालमण्डल टेलिभिजनयात जिमिसं सूचनामूलक नापनापं हे मनोरञ्जनात्मक टेलिभिजन कथं न्ह्याकाचवनागु दु।

थ्व टिभी चले यायेगुया मू उद्देश्य छु ख: ?

नेवा:तय्गु विषय ल्हवना, नेवा: जागरण हयेगु हे नेपालमण्डल टेलिभिजनया मू आजु ख:। नेवा:तय्गु राजनीतिक, आर्थिक, सामाजिक, सांस्कृतिक विषयवस्तुया उत्थान याना नेवा:तय्गु सुसूचित व जागरुक यायेगु आजु ज्वना जिपिं न्ह्यावनाचवंगु दु। अले नेपा:या मू सञ्चारमाध्यमतय्सं मल्लवंगु नेवा:तय्गु सुलाचवंगु विषययात नेपालमण्डल टेलिभिजनं क्वातुक ल्हवनी। राज्यया हर एक निकायलय् नेवा:तय्गु नं पहुँच थ्यंकेमा: धइगु तायेका जिपिं न्ह्यावनाचवनागु दु। नेपा:या मू सञ्चार माध्यमतय्सं नेवा:तय्गु विषय गाक्क मल्लवंगु जुया हे नेवा:दुने दुपिं यक्व हे प्रतिभातयत् सुनानं म्हमसियाचवंगु अवस्था दु।



नेवा: प्रतिभा पितहयेगु जिम्मेवारीबोध नं जिमिसं यानागु दु। सामान्यकथं धायेमा:सा नेवा:तय्गु राजनीतिक, आर्थिक, सामाजिक, सांस्कृतिक हरेक कथं हे नेवा:तय्गु थकायेगु परिकल्पना ज्वना नेपालमण्डल टेलिभिजन न्ह्यावलेनं न्ह्यावना चवंगु दु। नापं भीगु देय्या गुलि नं संस्कृति दु, नख:चख: व तजिलजियात सकिपा म्यूजिक भिडियो, वृत्तचित्र दयेका थज्व:गु संस्कृतियात संरक्षण व विकास यायेगु नं नेपालमण्डल टेलिभिजनया मू आजु ख:।

अन्दाजी स्वकुमि गुलि दु ? अले अघ्व: याना: छु वर्ग व उमेरयापिन्सं स्वयाचवंगु दु ?

स्वनिगलय् दुगु दक्व नेवा: वस्तीयापिंसं नेपालमण्डल टेलिभिजन स्वयाचवंगु दु। अले स्वनिगलं पिनेया नेवा: वस्तीइ नं नेपालमण्डल टेलिभिजन स्वयाह:गु दु।

टेलिभिजनया माध्यमं नेवा: तजिलजि, भाषाया थपू यायेत छु याये मालीथें च्वं ?

नेवा:तय्सं हरेक संस्कृति, तजिलजि न्ह्याकाचवंगुया ल्यूने तसकं हे महत्वपूर्णगु कारण दयाचवनी। नेवा: भाय्, तजिलजि, सम्पदा, संस्कृति आदि दुने नं सुलाचवंगु नेवा:तय्सं मसियाचवंगु अले यक्व हे महत्वया विषयत दु। थज्व:गु महत्वया विषययात पितहयेगु नेपालमण्डल टेलिभिजनया कुतल नेवा: भाय्, तजिलजिया थपू यायेत ग्वाहालि जुइ।

नेपालमण्डल टिभी धइगु व्यवसायमुखी ख: कि सेवामूलक ख: ?

मुख्य याना नं नेपालमण्डल टेलिभिजन सेवामूलक हे ख:। सेवा बिइगु, नेवा:तय्गु सुसूचित यायेगु खँयात केन्द्रीत याना: हे जिमिसं हरेक ज्याभव:त न्ह्याकाचवनागु दु। व्यवसायिक कथं नाफा कायेगु जकयात केन्द्रीत याना जिमिसं ज्या यानागु मदु। छुं नं ख्यलय् सफल जुया न्ह्यावनेत पुरा हे नाफामूलक मजूसं व्यवसायिकता हयेमा:गु आवश्यकता धा:सा दु। नाफायात जक ध्यानय् तया ज्या मयानागु जूसं धेंधेवल्लाया युगय् थ:गु थाय् सुरक्षित यानातयेगु नितिं जिमिसं व्यवसायिकता नं छ्यलागु दु।

टेलिभिजन धइगु विशेष याना: युवावर्गया नितिं ख:। नेवा: युवातय्गु नेपालमण्डल स्वक्रेत छु गज्या:गु कुत: जुयाचवंगु दु ?

युवातय्गु लक्षित यासं टेलिभिजनपाखें यक्व हे ज्याभव:त कयनाचवंगु नापं अझ

यक्व हे ज्याभव:त कयने ल्यंदनी। आ: वइगु दिनय् नं कासा, शिक्षा, स्वास्थ्य, कानून, आर्थिक नापं थीथी ख्य:लिसे स्वापू दुगु ज्याभव:त न्ह्याकेगु जिमिगु योजना दु। युवातय्गु ध्यान सालेगु कथं हे टेलिभिजनय् प्रसारण जुयाचवंगु हरेक ज्याभवलय् जिमिसं छगू कथंया न्हूगुपन, फरकपना हयेगु कुत: यानागु दु।

थज्या:गु तच्च:गु धेंधेवल्लाया युगय् नेपालमण्डलया मेमेगु संचारमाध्यमलिसेया स्वापू व धेंधेवल्ला गुकथन्ह्यानाचवंगु दु ?

थ्व सञ्चारया युगय् तसकं हे धेंधेवल्ला दुगु हे जुल। जिमिसं नेपालभाषं हे प्रसारण याना चवनागु जुल। थुकिया सकारात्मक पक्ष धायेमा:सा धेंधेवल्लाया युगय् नेवा: समुदायपाखें जिमित नैतिक व भौतिक ग्वाहालि वयाचवंगु जुल। नेपालमण्डल नेवा:तय्गु खँ ल्हवनाचवंगु दु धका: यक्व हे उद्धार हृदयं जिमित ग्वाहालि याइपिनिगु नं कमि मजू। अले जिमिसं नेवा: केन्द्रित जुया वनागु अले केवल टेलिभिजन जुया, स्पाटलाइटय् थ्यनेधुंकूगु राष्ट्रिय सञ्चार माध्यमत नापं नं धेंधेवल्ला यक्व हे न्ह्यानाचवंगु दु।

दकले लिपा, नेवा: अनलाइनन्यूजपाखें क्वमि व स्वकुमिपिन्ति छु धयादी ?

दकले न्हापां ला स्वकुमिपिनिगु साथ, माया, मतिनाया कारणं हे नेपालमण्डल टेलिभिजनया यात्रा थनतक थ्यंगु जुल। उकिया नितिं जिगु नापं सकल नेपालमण्डल टेलिभिजन परिवारपाखें दुनुगलनिसें हे सुभाय विद्याचवना।

नेपालमण्डल टेलिभिजनया यात्रायात अझ हे यक्व न्ह्यज्याके मा:गु आवश्यकता दु। थुगु टेलिभिजन धइगु सकल नेवा:तय्गु हे न्हाय्कं ख:। नेपालमण्डल टेलिभिजन गुलि विकसित जुल उलि हे नेवा:तय्गु विषय उत्थान जुइगु ख:। उलि हे नेवा:तय्गु पहुँच व चेतनाया स्तर थाहाँ वनीगु ख:। नेपालमण्डल टेलिभिजन गुलि विकसित जुल उलि हे नेवा:तय्गु आर्थिक सामाजिक स्तर थाहाँ वनीगु ख:। अथेजुया थुगु खँयात थुइकुसें नेवा: समुदायपाखें वइगु दिनय् नं अझ साथ बियादी धका: भलासा कयाचवना। नेपालमण्डल टेलिभिजनयात सकल नेवा:या थ:गु हे टेलिभिजन धका: नाला:, जिमिसं मचा:गु व मगा:गु खँया नं सुभाय बियादी धका: नं भलासा कयाचवना। सुभाय।

श्रोत: नेवा:अनलाईन

साहित्य/चिनाखं

ज्ञान

नाति महर्जन

द्यःचपा, पाँगा

जगते छुं महु थःगु धैगु
सितकी नापं ज्वना वने दैगु
गथे खः भ्नीपिं पचिं वया
अथे हे नाङ्गा वने मनीगु
भोग याय दै खालि थःमहं पिना वयागु
दै मखु मेपिन्सं दुःख याना तःगु
थःगु लागि थःमहं हे धर्म कर्म यायमा
दैमखु छुं नं कतपिनिगु
न्त्याबलें धर्मया लँय जुइगु
परोपकार जुया म्वाना च्वनेगु
मभिंगु ज्या मतीं मतःसे
न्त्याबलें धार्मिक ज्याय मन छवयगु
असहाय रोगीपिन्त ग्वाहालि यायगु
दिन दुःखिपिन्त भोजन बिइगु
निश्चार्थ भावं दान पुण्य याना
गरिबतयगु न्त्याबलें सेवा यायेगु
देके वनेम्बाः मफु मफु देगःपतिं
द्यो गरिबया नुगले दुने तिनी
लोहँया मूर्ति छयों हाका छुयाय्
द्यःधइम्ह भ्नीसं म्हहे मस्यून
द्यः गरिबया नुगले सुलाच्चनी

भ्नी उखेंथुखें जुगु खनाः न्हिलाच्चनी
गरिबया बल्चाय् द्वाहां वनकि तिनी
भ्नीसँ धार्थें याम्ह द्यो धाःम्ह खनि
सत्य अहिंसा या लँ ज्वना जुइगु
सतसंगते न्त्याबलें मन छवयेगु
रिस रागया किचः मवथाय्
शान्तिया निभा त्वःथाय् च्वनेगु
सकल प्राणीया जय जुइगु
हिंसा धइगु स्वैगुं मयायगु
कतु वचन ल्हाना कतकित दुःख बिइगु
नं तःधंगु छगु हिंसा खः थुइकेगु
सकसियां आत्मा छगु थें धैगु
भ्नी सकसिनं सिइका तयगु
स्वैगुं आत्मा स्याक खँल्हाय् मज्यू
लगेजुई स्याःगु आत्मां श्राप ब्यूगु
सकसियां नाप मिलेजुया च्वनेगु
थःसिवे गरिबपिन्त ग्वाहालि यायगु
छुं हे याय मफुपिं फोना नयमाःपिन्त
थःमहं छछा द्वांलानासां नका छवयगु
भिंगु ज्यायाःपिं भिना वनी
मभिंगु ज्यायाःपिं स्यनावनी
भिंगु मभिंगु ज्याया लेखा जोखा
अन्तरयामि भगवान यानाच्चनि
छन्हू थ्व सरिरं प्राण ब्वया वनी
सरिर चाय् ल्वाक ज्याना तना वनी
आः म्वाना च्वंतले खुनु
सकसितं खुसी याना
धाय्का च्वने सकसिनं ग्यानी गुनि

हाइकू

लःया ब्यापार...

राम शरण महर्जन

लखं लँ हिल
लः वन गन मस्यू
लः लः कि बिख ?१।

दुरुपुखु दु
म्हः नव, वसः हाकु
लः स्वये थाकु ।२।

लः वगु मखु
लः तनी गनं मस्यू
चाः न्हिः लखं नः ।३।

लः वः भ्वंतय्ला
कय्ता मदुगु ज्या,खँ
न्यंन्यं न्हाय्पं स्याः ।४।

त्वने लः मदु

धःजाया बस्ती नवः
डेराय् च्वं मदु ।५।

पाइप मस्यं
धेवा वाः वः, मनू स्यं
प्याःचापिं न्ह्य वः ।६।

ब्रतला मखु
त्वने लः तकं मदु
द्यो वम्हः सु दु ?७।

लः त्वंके मफू
भुतु मच्या, वासः ग्वः?
न्हिलाःसां म्वा हँ ।८।

सः यायां मगाः
सलय् सः हे मदु थौं
ख्वं थागु ल्हाः थें ।९।



श्रीकृष्ण महर्जन

नेवाः संस्कृतियात स्वयेमाःगु पहः व उकिया अर्थ

स्वस्थानि धइगु छु खः ?

स्वस्थानी

दैय् दसं पोहेलाथ्व पुन्हिनिसं
सिल्लाथ्व पुन्हि तक मनूतय्सं लुमंकी
स्वस्थानी । स्वस्थानी धइगुया अर्थ
छयलाबलय् स्व धइगु थः अले स्थान
धइगु थाय् खः । थःगु हे थाय्या बाखं
जुया हे जुइ साय्द लच्छि तक कनीगु
बाखंयात हे स्वस्थानी बाखं धाःगु
धकाः अःपुक हे अनुमान यायेफइगु
अवस्था दु ।

स्वस्थानी देवीयात मनूतय्सं
थःथःगु कथं ब्याख्या याना वयाच्वंगु
दु । हिन्दू धर्मालम्बीतय्सं महाद्यःया
कला पार्वती धाइम्ह हे स्वस्थानी धायेगु
याना वयाच्वंगु दुसा गुलिं गुलिसिनं
महालक्ष्मी, वसुन्धरा धायेगु याना
वयाच्वंगु दु । अले सक्वय्च्वपिन्सं
वज्रयोगिनी द्यः धाइम्ह हे स्वस्थानी
खः धकाः धायेगु याना वयाच्वंगु दु ।
गुलि गुलिसिनं आकृति मदुम्ह द्यः हे
स्वस्थानी द्यः धकाः नं धायेगु याना
वयाच्वंगु दु ।

स्वस्थानीया मूर्ति

स्वस्थानी द्यःया मूर्ति माला स्वयेगु
खःसा आः तक लुयावःगु कथं दक्ले
पुलांगु मूर्ति येंया तरनी बहालय् दु ।

**‘स्वस्थानीदेवी धाइम्ह
महामायाया शक्तिया
छगू रुप खः ।
महामाया शक्तियात
मूल प्रकृति नं
धायेगु याः । थ्व
विश्वब्रम्हाण्ड फुक्क
उम्ह हे मूलप्रकृतिरुप
दैवी शक्तिं
दयाच्वंगु खः ।**

स्थानीय नेवाःतय्सं तरणी अजिमा द्यः
धायेगु याना वयाच्वंगु भगवतीया मूर्ति
दुगु मखं लागाया तरणि बहाः थौंसिवें
थ्यंमथ्यं भिंछसः दँ न्ह्यः थकू जुजु
शंकरदेवं दयेकूगु खः धाइ ।

अले व हे बहालय् पश्चिमपाखे
स्वकातःगु छगू कलात्मक मूर्ति दु उगु
मूर्तियात हे स्वस्थानीया मूर्ति धायेगु
याना वयाच्वंगु दु ।

येंया तत्कालिन जुजु प्रताप मल्लं
उगु मूर्ति दयेकावंगु खः धाइ ।
स्वस्थानीया उगु मूर्ति वास्तव्य महाद्यः
व पार्वतीया मूर्ति खः । आः तकया
दक्ले पुलांगु कथं नालातःगु स्वस्थानीया



मूर्ति हे उगु महाद्यः पार्वतीया मूर्ति
खः ।

अथे हे थौकन्हय् सक्वय् स्वस्थानी
द्यःया देगः हे दयेका मूर्ति पलिस्था याःगु
दु । अष्टमातृकाया प्रतिक कथं
च्याकुंलाःगु कलात्मक देगः दयेका दथुइ
लाक्क स्वस्थानी द्यःया मूर्ति पलिस्था
याःगु दु ।

उम्ह द्यःया मूर्ति छुं ई न्ह्यः जक
दयेकूगु खः । प्यपा ल्हाः दुम्ह उगु
मूर्तिया जव ल्हातं खइगु अले खव ल्हातं
च्वमो ज्वनाच्वंगु दु । अथे हे मेगु छपा
ल्हाः बर्दान मुद्राय् दुसा छपा ल्हातं
पलेस्वां ज्वनाच्वंगु दु ।



स्वस्थानी बाखनय् संस्कृतभाषं
उल्लेख यानातःगु कथंया मूर्ति हे सक्वय्
दयेकूगु खः । सफुतिइ स्वंगः मिखा
दुम्ह, लुँयागु वर्ण दुम्ह, प्यपा ल्हाः दुम्ह,
मुलुकछ्याना च्वंम्ह, ह्याउँगु वसः
पुनातःम्ह नापं चाकःछि अष्टमातृका
दुथाय् च्वनाच्वंम्ह हे स्वस्थानी देवी खः
धकाः उल्लेख जुयाच्वंगु दु ।

अथे हे नेवाः संस्कृतिविद् बलदेव
जुजु संयोजनकर्ता जुयादीगु स्वस्थानी
बाखं सफुतिइ स्वस्थानी धाइम्ह महामाया
शक्तिया छगू रुप खः धकाः न्ह्यथनातःगु
दु । उगु सफुतिइ स्वस्थानी बाखनय्
धयातःगु दु ‘स्वस्थानीदेवी धाइम्ह

महामायाया शक्तिया छगू रुप खः ।
महामाया शक्तियात मूल प्रकृति नं
धायेगु याः । थ्व विश्वब्रम्हाण्ड फुक्क
उम्ह हे मूलप्रकृतिरुप दैवी शक्तिं
दयाच्वंगु खः । मिं पुइगु, लखं
ख्वाउसे च्वंकीगु, सूर्यवं निभा
त्वयेकीगु अदि संसारया सकतां ज्या
प्रकृतिया हे व्यवस्था खः । अज्वम्ह
शक्तिरुप परमेश्वर हे स्वस्थानी खः’
धकाः उल्लेख यानातःगु दु । थुगु
ल्याखं स्वल धाःसा स्वस्थानीयात
थःथःगु कथं नाला वयाच्वंगु दु अले
सफुतिइ नं ब्यागलं ब्यागलं कथं
च्वयातःगु दु । कथंहं.....

फागुन १ गतेनिसैं किपुलिङ नेवा: भाय् ईन्स्टिच्यूट संचालन याइगु



वइगु फागुन १ गते श्रीपञ्जमीया दिनिसैं किपुलिङ नेपालभाषा स्यनीगु ईन्स्टिच्यूट संचालन जुइगु जूगु दु। भिंतुना ईन्स्टिच्यूटपाखें अथे नेपालभाषा कक्षा संचालन यायेत्यंगु खः। कक्षाय् रंजना लिपि, प्रचलित लिपि तकं स्यनेगु ज्या जुइ।

रञ्जना व प्रचलित लिपि कक्षा लहना वा:पौया सम्पादक जुजुमान महर्जनं स्यनादीगु जूगु दुसा उगु कक्षाय् भायलचं नं स्यनीगु जूगु दु।

भिंतुना ईन्स्टिच्यूटपाखें अंग्रेजी, जापानी, चाइनिज भाषा स्यनेगु नाप नाप एस एल सि या तयारी कक्षा नं संचालन याइगु जूगु दु। किपूया नयाँ बजार पांगा दोवाटोय् उगु कथंया ईन्स्टिच्यूट संचालन यायेत्यंगु खः। उगु ईन्स्टिच्यूटय् प्लस टू, डिप्लोमा व डिग्रीया दक्क विषयसं द्यूसन वंकी धका: ईन्स्टिच्यूट जानकारी बिउगु दु। अथे हे पत्रकारिता प्रशिक्षण नं संचालन याइगु जूगु दु।

थिमिया पाटी विहारय् महापरित्राण पाठ



विश्व शान्तिया कामना यासैं मध्यपुरथिमि पाटी विहारया वा: पतिङ न्ह्यानाच्वंगु महापरित्राण पाठ व धर्मदेशना ज्याभवः जुगु दु।

पाटी विहार सहयोग समिति पाखें ग्वसा:ग्वगू महापरित्राणया ज्याभवल्य् अखिल नेपाल भिक्षु महासङ्घयात अष्टपरिकार मुलु, का, स्वगू कथंया चिवर, कायबन्धन, पिण्डपात्र, ल: चालय् यायेगु काप, दान या:गु खः।

थ्व हे माघ १७ गते निसैं न्ह्या:गु उगु ज्याभवल्य् महासङ्घया भिक्षु महापरित्राण पाठ तथा बौद्ध धर्म व दर्शनसम्बन्धी प्रवचन विइगुया लिसैं थीथी थासय् ज्ञानमाला भजन खल: पाखें भजनकीर्तन या:गु खः। थ्वया न्ह्य: विसं २०४६ य् उगु महापरित्राण पाठ व धर्मदेशना ज्याभव ग्वसा: ग्वगु खः। मध्यपुर थिमिया गुगू विहार मध्ये पाटी विहारया धम्म कक्षय् १३ फिट त:ग्व करिव स्वद्व किलो सिजं बुद्धया प्रतिमा नं दु। उगु प्रतिमाय् लुंया जलप यायेगु ज्याभव: दुगु समितिया नाय: श्यामकृष्ण मानन्धरया जानकारी वियादीगु दु।

न्हू संविधानय् संशोधन : भीगु सरोकार निरन्तर संघर्ष व आन्दोलन याना: वनेमा:



येंया क्षेत्रपाटी पार्टी प्यालेसय् शुक्रवा: न्हिनय् 'न्हू संविधानय् संशोधन : भीगु सरोकार' विषयक छगू त:जिगु ज्याभव: जुल।

नेवा: स्वायत्त राज्यया नितिं आन्दोलन याना वयाच्वंगु नेवा:तयगु मंका:गु मोर्चा नेवा: स्वायत्त राज्य मंका: संघर्ष समितिया ग्वसालय् जूगु उगु ज्याभवल्य् समितिया वर्तमान नाय: मनोज नेवा: खड्गीया सभापतित्वय् न्ह्या:गु खः।

ज्याभवल्य् मूपाहाँ कथं भायादीपिं एमाओवादीया सांसद श्याम श्रेष्ठ न्हूगु संविधान पिहां वयेधुंका: भीपिं वूगु मखु धासैं भीसं पराजयया मनस्थिति तयेमज्यूगु खँ कनादिल। वय्कलं संविधान पिदने धुंका: भीपिं छगू टफ्काय् जक ल्युने ला:गु खः धयादिसैं आ:या संघीयता पूर्ण संघीयता मखु, अधिकृती संघीयता जक खः धका: धयादिल। सांसद श्रेष्ठ संविधानय् भीगु असहमतित छुछु खः व संशोधन यायेमा:गु विषय छुछु खः, व फुक्क छथाय् तया: निरन्तर आन्दोलन यायेमा:गु व थथे जुल धा:सा भीगु आन्दोलन सफल जुइगु खँ कनादिल।

अथेहे, ज्याभव:या मेम्ह मूपाहाँ आदिवासी जनजाति नेता दिनेश घलें संविधान संशोधन जूसां भीसं व मगा: थ्व मगा: धायेफयाच्वंगु मदु धासैं भी सकले आदिवासी जनजातिपिं छथाय् च्वना: आन्दोलनयात निरन्तरता विइमा:गु व निरन्तर आन्दोलन यायेगु बाहेक मेगु विकल्प मदु धका: धयादिल।

उगु ज्याभवल्य् ग्वसा: खल: नेवा: स्वायत्त राज्य मंका: संघर्ष समितिया सचिवालय कजि मल्ल के. सुन्दरं संविधान पिहां वये न्ह्य: हे न्हूगु संविधानय् असहमत दु धका: धयावयाच्वनागु खः धका: धयादिसैं आ: भीसं भी सकल नेवा:निसैं आदिवासी जनजातिपिं छथी जुया निरन्तर आन्दोलनय् वनेमा:गु विचा: प्वकादिल।

अथे हे ज्याभव:या सभानाय: व समितिया वर्तमान नाय: मनोज नेवा: खड्गीं लसकुस न्वचू वियादीगु ख:सा वय्कलं थ:गु लसकुस न्वचूया भवलय् भीगु अधिकारया नितिं निरन्तर संघर्ष यानातु वनेमा:गु विचा: प्वकादिल। ज्याभव: संघीय समाजवादी नेवा: संघया महासचिव सत्यनारायण डंगोल न्ह्याकादीगु खः।

तपाईंको टोलमा भएका घटना कीर्तिपुरको समाचार बनाउने
हो भने तपाईं एक कल फोन गर्नुस् हामी तपाईंको टोलको
समाचार कीर्तिपुरको समाचार बनाईदिनेछौं

**कीर्तिपुरको
चित्रण**



किपुलिं पिदनाच्वंगु कीर्तिपुर सन्देश वा:पौ व ज्वज्वलपा: वा:पौया ग्राहक जुइगु नितिं स्वापू तयादिसैं

कार्यालय: निखासी टोल: कीर्तिपुर नपा-३
फोन नं.: ४३३३००७, ९८४१४०१०७७

ज्वजलपा वा:पतिङ छिगू चिनाखँ/बाखँ/हाइकू विज्ञापन
व मेमेगु च्वसू पिथनेगु जूसा जिमित स्वापू तयादिसैं

सकलसिगु मंका: स:



ज्वजलपा वाश्यो

ज्याकू: निखासी त्वा: किपू नपा-३ फोन ल्या: ४३३३००७,
९८०८६२६४२० ई-मेल : kirtipur_sandesh@live.com